

Изменяемые песнопения Воскресной Литургии

Тропари и кондаки Воскресные восьми гласов

Глас 1 Тропарь

Шүгар күм иудей-шамыч печатлен коденыт, да салтак-шамыч Тыйын Эн яндар Капетым оролен шогеныт гынат, Тый, Утарыше Юмо, кумшо кечын ылыж кынелынат, да тўнялан илышым пөлекленат. Сандене Тыланет, Илышым пуышылан, Пылпомышысо Куат-влак муреныт: «Айдемым йöратыше Христос, Тыйын ылыж кынелметлан тау, Тыйын Кугыжанышетлан тау, Тыйын виктарен шогыметлан тау».

Кондак

Юмо улметлан көра шүгар гыч кугу чап дене ылыж кынелынат да Шке пеленет тўням ылыжтенат. Айдемын пүртүсшö Тыйын Юмо улметым моктен мура да колымаш пытен. Ашныше Юмо, теве Адам йывырта да шинчыр гыч утаралтмыжлан Ева куанен пелешта: Христос, Тый вет чылаштлан ылыж кынелмашым пуэт.

Глас 2 Тропарь

Колыдымо Илыш, Тый колымаш марте воленат да Юмын волгыдет дене тамыкым пытаренат, шүгарыште улшо-влакым ылыжтенат, да Пылпомышысо чыла Куат-влак муреныт: «Илышым пуышо Христос Юмына, Тыланет чап лийже!»

Кондак

Чыла сенгыше Утарыше, Тый шүгар гыч ылыж кынелынат. Тыгай чудым ужын, тамык лўдын, колышо-шамыч ылыж кынелыныт. Тидым ужын, чыла чонан Тый денет пырля куана, Адам йывырта. Утарыше Юмем, уло тўня Тыйым чарныде мокта.

Глас 3 Тропарь

Пылпомышто чылан йывыртышт, мландымбалне чылан куанышт, вет Господь Шке кид вийже дене кугыжанышым ыштен, колымыжо дене колымашым сенен, колышо-шамыч кокла гыч икымше ылыж кынелше лийын; тамыкын көргыж гыч мемнам утарен да тўнялан кугу чаманымашым пөлеклен.

Кондак

Чаманыше Юмо, таче Тый шүгар гыч ылыж кынелынат да мемнам колымашын капкаж гыч луктынат. Тиде кечын Адам йывырта, Ева куана, да нунын дене пырля пророк ден патриарх-шамыч Тыйын кучышетын божественный куатшым чарныде моктен мурат.

Глас 4 Тропарь

Ылыж кынелме нерген Суксо деч куан уверым колын да кугезе-шамычын языкыштым кудалтыме нерген пален, Господын тунемшыже-шамыч апостол-влаклан йывыртен ойленыт: колымаш сеналтын, тўнялан кугу чаманымашым пўлеклыше Христос Юмо ылыж кынелын.

Кондак

Мыйын Чаманышем да шўгар гыч Утарышем, Юмо улметлан кўра Тый мландымбалне шочшо-шамычым колымаш шинчырышт гыч ылыжтен кынелтенат, тамыкын капкажым шалатенат. Ашныше Юмо улмет дене кумшо кечын ылыж кынелынат.

Глас 5 Тропарь

Ача Юмо да Святой Шўлыш гаяк Тўнгалтышдыме Шомакым, мемнам утарышаш верч Ёдыр деч шочшым, ме, ўшаныше-влак, моктен мурена да Тудлан кумалына, вет Тудо капше дене Ыресыш Шке кумылын нўлталтын да колымашым чытен, чаплын Ылыж Кынелмыже дене колышо-влакымат ылыжтен.

Кондак

Утарыше Юмем, Тый тамыкышке воленат, Чыла кертше семын тудын капкажым пудыртенат, Пўрышў Юмо семын Тый колышо-шамычым Шке пеленет ылыжтен кынелтенат да колымашын умдыжым пытаренат. Айдемым йўратыше Юмо, Тый Адамым каргымаш гыч утаренат, сандене ме чыланат Тыйым сўрвалена: «Господь, мемнам утаре!»

Глас 6 Тропарь

Тыйын шўгарыштет Суксо-влакын улмышт годым оролен шогышо-шамыч колышо гай лийыныт да шўгарыштет Мария шоген, эн яндар Капетым кычалын. Тый тамыкым сененат, тудо Тыйын ваштареш шоген кертын огыл. Илышым пуышо, Тый Яндар Ёдырым вашлийынат. Колымаш гыч ылыж кынелше Господь, тау Тыланет.

Кондак

Илышым пуышо Христос Юмына иландарыше кидше дене колышо-шамычым пундашдыме пычкемыш гыч ылыжтен, да айдеме тўнялан ылыж кынелмашым пуэн, вет Тудо – чылам Утарыше, Ылыжтен кынелтыше да Илыш да чылаштын Юмышт.

Глас 7 Тропарь

Христос Юмо, Тый Ыресет дене колымашым пытаренат, разбойниклан райым почынат, миром кондышо ўдырамаш-шамычын шортмыштым куаныш савыренат, тўнялан кугу чаманымашым пуэн, апостол-влаклан ылыж кынелмет нерген туныктен кошташ шўденат.

Кондак

Колымашын куатше ынде ен-влакым кучен огеш керт, вет Христос волен да тудын вийжым шалатен пытарен. Тамыкым шинчырлыме; пророк-влак ик йўк дене куанен увертарат: Ўшанен илыше-шамычлан Утарыше толын, ўшанле-влак, ылыж кынелаш лекса.

Глас 8 Тропарь

Чот чаманыше Юмо, Тый кўшыч воленат, мемнамат орлык гыч утараш манын, кум кечылан тойымашым шке кумылын чытенат. Господь, Тый мемнан Илышна да Ылыж кынелмашна улат, тау Тыланет.

Кондак

Шуко чаманыше Юмо, шўгар гыч ылыж кынелын, Тый колышо-шамычымат нўлталынат, Адамым ылыжтен кынелтенат да Тыйын ылыжметлан Ева куана, колымаш гыч ылыж кынелметлан тўнян чыла ужашыже йывырта.